

2003 nr. 43 24. mars**Lög um björgunarsveitir og björgunarsveitarmenn**

Tóku gildi 1. júlí 2003. *Breytt með:* L. 23/2004 (tóku gildi 11. maí 2004). L. 46/2006 (tóku gildi 1. jan. 2007 nema 6. gr. og ákvæði til bráðabirgða sem tóku gildi 16. júní 2006). L. 82/2008 (tóku gildi 1. júní 2008, birt í Stjtið. 19. júní 2008). L. 162/2010 (tóku gildi 1. jan. 2011). L. 126/2011 (tóku gildi 30. sept. 2011). L. 32/2013 (tóku gildi 1. júní 2013). L. 59/2013 (tóku gildi 1. júlí 2013).

Ef í lögum þessum er getið um ráðherra eða ráðuneyti án þess að málefnasvið sé tilgreint sérstaklega eða til þess vísað, er átt við **dómsmálaráðherra** eða **dómsmálaráðuneyti** sem fer með lög þessi.

I. kafli. Gildissvið og skilgreiningar.**■ 1. gr. Gildissvið.**

□ Lög þessi taka til björgunarsveita og björgunarsveitarmanna sem starfa innan viðurkenndra heildarsamtaka björgunarsveita.

■ 2. gr. Skilgreiningar.

□ Með *björgunarsveit* er átt við félag sem á grundvelli sjálfboðaliðastarfs tekur þátt í björgun, leit og gæslu að beiðni stjórnvalda.

□ Með *björgunarsveitarmanni* er átt við skráðan einstakling í björgunarsveit sem tekur þátt í björgun, björgunarfingum, leit og gæslu.

□ Með *stjórnvöldum* er átt við öll stjórnvöld sem lögum samkvæmt fara með yfirstjórn björgunar- og leitarmála á hverjum tíma. Þau stjórnvöld sem nú eiga hlut að björgunarmálum eru [ráðuneytið],¹⁾ [almanavarna- og öryggismálaráð],²⁾ almannavarnanefndir, [Samgöngustofa],³⁾ [rannsóknarnefnd samgönguslysa],⁴⁾ Landhelgisgæslan, ríkislögreglustjóri, [lögreglustjórinn á höfuðborgarsvæðinu, lögreglustjórinn á Suðurnesjum],⁵⁾ sýslumenn sem lögreglustjórar og slökkviliðsstjórar.

□ Með *björgun* er átt við björgun manna eða verðmæta frá yfirvofandi hættu eða tjóni.

□ Með *leit* er átt við leit að mönnum eða verðmætum.

□ Með *gæslu* er átt við aðstoð við að gæta manna og verðmæta á svæðum sem lokað hefur verið vegna hættuástands.

¹⁾ L. 126/2011, 364. gr. ²⁾ L. 82/2008, 35. gr. ³⁾ L. 59/2013, 23. gr. ⁴⁾ L. 32/2013, 5. gr. ⁵⁾ L. 46/2006, 10. gr.

II. kafli. Hlutverk, réttindi, skyldur og tryggingar björgunarsveita og björgunarsveitarmanna.**■ 3. gr. Hlutverk björgunarsveita og björgunarsveitarmanna.**

□ Hlutverk björgunarsveita og björgunarsveitarmanna er að starfa í þágu almannaheilla með þátttöku við björgun, leit og gæslu á ábyrgð stjórnvalda og í samvinnu við þau.

□ Stjórnvöld skulu í samráði við heildarsamtök björgunarsveita gera samkomulag um samskipti og samstarf björgunaraðila þar sem er kveðið á um skipulag björgunarmála, upplýsingaskyldu, útköll og boðskipti.

■ 4. gr. Skyldur björgunarsveita og björgunarsveitarmanna.

□ Björgunarsveitum er skylt að hefja björgun, leit og gæslu ef stjórnvöld óska þess.

□ Björgunarsveitarmönnum er skylt að gæta þagmælsku um mál sem þeir fá vitneskju um við störf samkvæmt lögum þessum og leynt skulu fara samkvæmt fyrirmælum stjórnvalda og eðli máls.

■ 5. gr. [Vátryggingar.]

□ Björgunarsveitum er skylt að tryggja björgunarsveitarmenn vegna slysa er þeir kunna að verða fyrir í störfum sínum á vegum björgunarsveita.

□ Björgunarsveitum er skylt að kaupa eignatryggingu fyrir tjóni á persónulegum munum björgunarsveitarmanna sem verða kann í störfum þeirra á vegum björgunarsveita.

□ Björgunarsveitum er skylt að kaupa ábyrgðartryggingu fyrir tjóni sem björgunarsveitarmenn kunna að valda þriðja aðila í störfum sínum á vegum björgunarsveita. Um skaðabótaábyrgð björgunarsveita fer að almennum reglum skaðabótaréttar.

□ [Ráðherra]¹⁾ setur í reglugerð²⁾ nánari reglur um vátryggingarskylduna, þar með talið gildissvið vátrygginga þessara og vátryggingarfjárhæðir.³⁾

¹⁾ L. 126/2011, 364. gr. ²⁾ Rg. 21/2005. ³⁾ L. 23/2004, 1. gr.

III. kafli. Gildistaka.**■ 6. gr.**

□ Lög þessi öðlast gildi 1. júlí 2003.